

重修花縣志

吳道鎔題籤



建置志

創建

古之善經國者則曰規模宏遠又曰善建不拔夫非規模則不善建非宏遠則鮮不拔始事顧不綦重歟故因其地以置縣域以封疆防以城池治以官師聯以戶口齊以科教昔人之籌畫可取以法也時而修之與民宜之毋曰營一小邑即經國豈越是其惟在民牧哉作創建

花山地舊屬番禺迤東西北三面萬山環峙與清遠從化南海三水諸邑接壤蓋緣山深谷窈口隘林叢屢爲萑苻嘯聚自明宏治間橫潭大盜譚觀福依險憑陵僉事陶魯芟除而後如唐亞六鍾國讓鍾國相蘇鳳宇練復寧吳萬雄輩旋滅旋起屠劫靡常大爲數邑之患萬歷時議設蘇尚白坭兩軍東西控防終不能制崇禎庚辰復行征剿於水西設清從州不果乃立番清從守備而賊之披猖如故稱爲番清從三不治之地焉

清初以來賊渠楊太公龔紫金張斌友伍亞青陳學進等剽擄四出

花縣志

卷三

建置志

環山數百里居民獸散荆榛彌望以向入版圖之境久埒珠崖康熙二十一年巡撫李士楨與總督吳興祚復大用兵蕩除窟穴削淨根株從舉人黃士龍等條議添設縣治會同將軍王永譽疏請建縣先於番禺慕德里之平嶺設營防守調右翼鎮遊擊一員守備一員千總二員把總四員目兵八百八十名中屯大營餘分防要害康熙二十四年戶科給事王又旦典粵鄉試特疏再請得奉俞旨巡撫李士楨率同廣州府知府劉茂榕南番三水清從各知縣躬親相度以平嶺地面開陽山川環遶堪建邑城康熙二十五年剖析南海番禺村鄉圖甲創立縣治部覆奉旨依議

康熙二十五年巡撫李總督吳具題三水縣知縣王永名調任新縣并擬名花縣其城垣縣署及學宮城隍廟社稷山川邑厲各壇城守儒學水西巡檢司各署預備倉義倉社學醫學陰陽學養濟院漏澤園義塚皆知縣王永名同紳士里老經始規畫卜地創建也

依舊志修

城池

易曰王公設險以守國築斯城鑿斯池誠王政之先務哉自平嶺設

縣以來亭障互衛桴鼓不驚朝廷紓北顧之憂邊塞絕晏開之警眞天水丸坭可封函谷矣修繕歲月可紀載焉作城池

縣城在平嶺營址後枕崇山前臨平壤左輔唐帽嶺右擁石巖塘正對白雲峯恢擴而南周四百四十丈高一丈四尺厚一丈二尺關四門上建樓櫓環以月城警舖一十二間雉堞六百三十個城脚外內各開馬路廣一丈有洩水竇三處議用磚石包砌東西北三面皆山南無濠塹惟廣聚商民以資稠密業經估計達部俟工築竣日請顏四門額名撰記勒石永垂規制實爲省城北門鎖鑰也

依舊志修

先是花縣初置鑿山爲城關土爲池雖規模畧具然歷二百餘年未修卑陋如故會咸豐四年紅巾煽亂迭次攻陷所有城垣衙署倉廩文廟概遭焚燬五年冬知縣張起鵬會同紳士宋蔚謙游鰲徐時亮黃湛瑩鄧秀峯鄧輔廷湯連昌劉純青杜愛棠羅萬斛袁體瑩謝家蘭宋廷桂羅邃湯日新盧桂芳畢龍祥謝郁蘭黃汝濟黃湘帆駱維樑等咨詢重建勸民捐輸鳩工庀材易以磚石仍舊址增厚二尺增高丈餘加八雉堞添炮堞四兵房四名東門曰東安西門曰西成南

## 花縣志

### 卷三 建置志

曰南薰北曰北平知縣張起鵬有記以誌其事

依府志阮通志及採訪冊參修

#### 廨署

官寺廬舍范書載之縣治地擁羣山區分六局鳴琴布治製錦宣猷彈丸小邑也守土者銜命傳宣嗣任者蕭規曹隨丹雘塗茨皆賴民力焉作廨署

知縣署在城中中爲大堂左爲贊政廳右爲龍亭中進爲穿堂再進爲正衙正廳一座燕室一座大堂前兩翼爲六房吏舍中爲甬道甬道前爲儀門左爲土神祠右爲禁獄又前爲大門正南爲照牆康熙二十四年知縣王永名創建嘉慶二十年知縣閻掄閣詳請修葺咸豐四年賊燬六年知縣張起鵬重建吏舍增爲十房

典史衙在縣署左創建於開縣時乾隆四十六年知縣王廷栢以修廟餘羨修葺

獅嶺巡檢司署在縣境西南橫潭街原隸番禺縣明洪武三年建後改隸本邑署仍其舊嘉慶五年知縣狄尙綱修咸豐四年賊燬六年知縣張起鵬重建

水西巡檢司署在縣境西北炭步墟其地初半屬從化半屬清遠盜賊由之出入明崇禎時議立清從州不果後設番清從守備府旋廢自開縣後設巡檢司於此創建衛署嘉慶五年知縣狄尙綱時修咸豐四年賊燬六年知縣張起鵬重建

教諭訓導署開縣時建於學宮內明倫堂之東嘉慶二十年知縣閻掄閣改建教諭署於櫺星門之東訓導署於櫺星門之西咸豐四年兩署被匪焚燬教諭暫住於花峯書院訓導暫住於花峯鄉塾至同治十年知縣周濟仁勸捐照前重建

增城營分防城守千總署在城內北門

河陽總局設在花峯書院

花峯局設在花峯鄉塾

均和局設在均和書院

一心局設在化龍書院

步雲局設在步雲書院

聯平局設在聯平書院

## 花 縣 志

### 卷三

建置志

三

獅峯局設在獅嶺墟內

按縣屬六局設立於咸豐五年後光緒十二年前後分爲十二局

曰花峯均和內分南北一心分東步雲分南北又十排衛良步雲分局國泰白

坭赤坭連安後復歸併

壇廟

左傳云務其三時修其五教民和年豐而神降之福誠哉崇德報功可以感天和矣吾粵俗素尙鬼禱祀綦繁惟有功德於民則祀之庶可以神道設教矣作壇廟

社稷壇 按會典社稷壇爲大祀壇在縣城南門外半里中曰雲雨風雷之神左曰境內山川之神右曰本縣城隍之神祭期每歲春秋仲月上巳日致祭縣官主祭僚屬陪祭

按山川壇嘉慶十六年奉部文改爲神祇壇

邑厲壇 按會典厲壇爲羣祀壇在縣城外北方一里祀無祀鬼神等以清明日十月朔日七月十五日祀

旗纛廟 按會典旗纛廟爲羣祀各守禦官於公廡後築壇設軍牙

大燾之神春祭用驚蟄日秋祭用霜降日

土地祠 在縣署儀門內左舊制以爲懲創之所每時節朔望縣官行香卽謁禮焉

城隍廟 按會典城隍廟爲羣祀廟在縣治東北建於開縣之時縣官上任先日齋宿啟祀神發誓文行香或遇水旱詣廟祭告祈禱

又一在橫潭墟相傳從化舊城在此其廟未遷

依阮通志修

附秦尙書蕙田城隍考

祈報之祭達於王公士庶京國郡邑而無乎不徧者在古惟社稷而後世則有城隍且其義其秩頗與社稷類而威靈赫濯奔走巫祝爲民物之保護官吏之所倚庇者則更甚於社稷在易曰城復於隍禮記天子大蜡八伊耆氏始爲蜡水庸居七水隍也庸隍也說者謂之古城隍之始自兩漢後廟祀見於志乘者則有吳赤烏之年號而北齊書慕容儼傳守郢城禱城隍神護佑事唐諸州長吏刺史如張說張九齡杜牧輩皆有祭文傳於世逮後唐清泰中遂封以王爵宋建隆後其祀徧天下明初京都郡縣並爲壇以祭

花縣志

卷三

建置志

四

加封爵府曰公州曰侯縣曰伯洪武三年去封號二十年改修廟宇俱如公廡設座判事如長吏狀迄於今牧守縣令朔望展謁文廟外則爲城隍偶有水旱鞠躬拜叩呼號祈請實唯城隍迎神賽會百姓施舍恐後亦唯城隍至廟貌之巍峩章服之鮮華血食品饌之豐繁歲時伏臘陰晴朝暮史巫紛若殆無虛日較之社稷之春祈秋報用牲伐鼓蓋十百矣夫明有禮樂幽有鬼神苟可以庇民利國者揆之聖人神道設教之意列之祀典固所不廢古人事殊其誼一也

按城內城隍廟上堂懸一大鏡上書照膽二字旁掛一聯曰鑒察兩隅看我良善報施何曾差了半點照臨三屬任爾奸邪鬼秘幾時逃過一人此乾隆四十五年知縣王廷栢所書也又掛一大珠算盤盤長五尺闊一尺六寸書曰人有千算天只一算陰謀暗算終歸失算此同治五年知縣彭榮紹所書也

關帝廟 按會典關帝廟爲羣祀咸豐三十年升中祀雍正三年詔加帝號爲忠義神武關聖大帝追封三代公爵乾隆五年頒定祭品

儀注九年頒定祭文十年詔加帝號靈佑嘉慶十九年詔加尊號仁  
勇道光七年詔加威靈廟建於城北縣署後康熙四十七年知縣王  
敏捐建廟門向南門前用磚石建有照牆惟建後不數月牆中心磚  
石拆裂屢建如是後在牆中間開一大圓窗牆始堅固形勝家云是  
處爲通城龍脉旺氣所在必須開窗以通旺氣理或然歟

王敏有新建關

帝廟碑列入藝文類

祀文乾隆九年頒定

春秋仲月上戊日及五月十三日祭

維 帝浩氣凌霄丹心貫日扶正統而彰信義威震九州完大節  
以篤忠貞名高三國神明如在徧祠宇於寰區靈應丕昭薦馨香  
於歷代屢徵異蹟顯佑群生恭值嘉辰遵行祀典筵陳籩豆儿奠  
牲膠尙饗

關帝後殿

曾祖光昭公

祖裕昌公

父成忠公

花縣志

卷三

建置志

五

祝文

維 公世澤貽庥靈源積慶德能昌後篤生神武之資善則歸親  
宜享尊崇之報列上公之封爵錫命優隆合三世以肇裡典章明  
備恭逢諏吉祇事薦馨尙饗

天后廟 按會典天后廟爲羣祀宮在城隍廟旁以春秋仲月癸日  
致祭康熙十九年封護國庇民妙靈昭應宏仁普濟天后乾隆二年  
加封福佑羣生

學宮建於王永名開縣之初規模草創見訓導駱身之學宮記重建  
於乾隆四十八年王廷柏捐建見教諭梁應乾福蔭祠序咸豐四年  
燬於紅匪六年知縣張起鵬督同在籍宋郎中勸捐修復餘事詳見  
學宮門

崇聖祠在學宮後西方原爲啟聖祠雍正元年詔改爲崇聖祠今崇  
聖祠匾額雍正九年知縣許鍾霖書餘事見學宮門  
名宦祠祀開縣知縣王永名康熙四十二年知縣施允中詳准入祀  
其祠位祭日祝文見學宮門

鄉賢祠祀舉人黃士龍康熙四十二年知縣施允中詳准入祀其祠位並祭日祝文見學宮門

昭忠祠

祀卹贈中憲大夫進士在籍刑部郎中宋蔚謙事見宋大夫專祠祀卹贈朝議大夫進士安徽蒙城縣知縣宋維屏見御製碑文其祠位并祭日祝文見學宮門

按各縣門首俱題忠義孝悌祠以忠臣孝子一同併祀祠內又禮部名宦鄉賢祠忠義孝悌祠節孝祠春秋仲月上丁日祀其昭忠祠擇地別建別日致祭今題寫昭忠祠而孝子悌弟致付關如似有未合想係建造時題寫之誤

節孝祠入祠姓氏未及備載其祠位祭日祝文見學宮門

福蔭祠康熙四十八年知縣王廷柏重建文廟發簿勸捐以紳民捐銀至五十兩以上者於櫺星門外建一祠曰福蔭祠列名次而祀之以爲慕義響應風者勸祠建於櫺星門之西儒學署後落成於康熙四十八年每歲春秋仲月文廟祭丁後一日致祭王廷柏書聯於大門

花縣志

卷二

建置志

六

曰地接宮牆近光分俎豆香紳民感王公厚意供王公長生祿位牌於祠買受祭田祭日各牌位裔孫飲福領胙祠內刊有牌名祭田土名神前對聯並教諭梁應乾所撰祠序訂裝成卷各執一本

施公祠康熙四十二年知縣施允中去任後遺愛在人紳民於西門內合掌街建有施公祠以誌不忘今已久圯其地尚存

宋大夫祠祀在籍殉難郎中宋蔚謙同時遇害者甘肅武監生千總銜王承猷本邑武生儘先千總鍾鴻灝附祀於側光緒二十三年丁酉歲建祀於關帝廟之西邊祠建上中下三堂旁有副室門曰宋大夫祠知縣祝掄望所書也

附錄請建專祠稿 其呈舉人宋士伸舉人羅朝棠一等輕車都

尉主事駱楸湘

中署

等爲奉旨准建專祠卜地建造理合聯呈察

核事竊惟國有偉人時遠而愈深愛戴鄉稱善士事往而更切謳思緣前已故郎中宋蔚謙道光庚子科舉人咸豐壬子恩科進士欽點刑部主事捐陞郎中咸豐五年邑內烽烟四起回籍團練有功克復縣城誘擊僞帥任亞喧擊敗股匪江緩統帶陸勇水勇悉

合機宜襄辦鄰邑鴉湖三坑等處不分畛域協獲逆首甘先卓著戰功首勸捐輸繳項數萬兩督修城垣文武署衙神廟倉廩總理防堵事務出力尤多咸豐六年十月經前縣憲張擢其勞績詳請以知府歸部遇缺即選并請賞戴花翎乃甫經大憲批准旋於七年正月二十三日統帶千總王承猷武生鍾鴻灝會勦清遠鄰匪督戰陣亡奉旨交部從優議恤八年二月經邑紳黃湛瑩游鰲羅朝棠等呈請情願爲宋郎中在花縣城內地公建專祠蒙大憲批准入告咸豐九年十二月初二日奉上諭勞崇光奏請將陣亡郎中建祠等語廣東在籍主事捐陞郎中宋蔚謙辦團帶勇隨同勦賊咸豐七年春間在清遠四九墟地方接仗陣亡業經加贈道銜給予卹典茲據該督奏稱花縣紳民請於城內建立專祠捐資辦理着照所請准其建祠所有同時陣亡弁勇准其一併附祀以順輿情而彰忠義欽此欽遵轉行遵照在案當經前縣憲督同邑紳黃湛瑩羅朝棠等踏看專祠地基訂於縣城北門內武帝廟西邊營造維時以兵燹之餘百物昂貴未遑興建迄今又三十餘年矣

若任湮沒不惟虛負天恩實無以昭欽式而示尊崇現紳等邀集宋郎中之孫宋式鵬宋紹常等公同酌議所有建造之費設法捐足仍遵照前縣憲踏定之地在城內武帝廟西邊建造擬於本年卜吉興工落成後奉主崇祀忖思宋郎中穗省奇才花峯傑士當北門之管鑰作南國之干城果敢本於性生能見危而授命忠誠矢於敵愾有殺身以成仁英標宛在崇報宜隆聖訓如新馨香允愜理合將擇地建造專祠情形呈請察核切赴

奉旨捐建宋公專祠記 蓋聞以死勤事宜崇俎豆於千秋爲國郊忠渥荷絲綸于九陛然或官司守土殉節危城將士從戎捐生絕域悉屬分中之責咸叨身後之榮矧以邑紳而救患恤隣以書生而見危授命慘同裹革烈甚銜鬚如花縣宋君尤爲卓卓者也君諱蔚謙字毓臣早掇泮芹旋膺廩粟蟾宮注籍桂輪奉南國之香雁塔標名杏醮承西曹之寵洎入貲而晉郎署暫乞假而還故鄉時則黠鼠跳梁遊魚聚釜兵羸衆亂寇熾民逃乘槎無復張騫執戈何有汪疇君乃籌防覓勇烟掃狼烽築壘培城雲連雉堞固

已澤流桑梓威靖萑苻矣屬當警起隣封氛侵中宿值軍書之旁  
午忘夙夜之艱辛君則矜域無分師徒有備毛錐安用手劍親提  
萬甲胸羅裏犀袍而血戰五申令肅探虎穴而心雄豈期逆勢鴟  
張妖稜蝟集竟因衆寡不敵力竭陣亡惜哉大吏露章遽聞於朝  
遂膺優卹之典天子覽疏深褒其義晉昇觀察之銜許廕職于世  
官祀昭忠於闔郡紳民感念父老謳思復籲請捐建本籍專祠經  
大府上聞得旨俞允茲者鳩工締構翬彩焜煌松茂竹包廟貌壯  
花峯之邑蘋香藻潔英靈揚粉社之輝冀此邦立懦廉頑可使士  
敦氣節惟儒者成仁取義豈徒人重科名烈魂如生長共汗青而  
照耀忠魂克慰不隨血碧以銷沉歷久彌芳如斯不朽已賜進士  
出身誥授光祿大夫經筵講官戶部尚書武英殿總裁署翰林院  
掌院學士加三級羅惇衍拜撰

盤古神壇在獅嶺北四里

按此神壇屹立半山凡禱必應洞內煙火萬家悉奉爲主香火甚  
盛嘉慶二十四年重修光緒二十年建八角亭於壇前備極美麗

## 花縣志

### 卷三

建置志

八

而未立神廟說者謂盤古王時穴居野處未有宮室故不立廟理  
或然也

依府志及採訪冊參修

蘭泮廟在丫髻西七里

依府志修

按蘭泮廟創建於前明其由來不可考而香烟甚盛北自獅嶺南  
自赤坭西自白坭東則佳錦山一帶各鄉資爲保障水旱疾疫凡  
有事焉必禱禱必應屢經各鄉捐貲恢擴祠宇丹雘一新神赫厥  
靈人展厥誠有自來矣

晴巒古廟在縣城東北十餘里於嘉慶年間由茶亭尾鄺瑞創建  
按鄺瑞平生以修煉爲懷在百丈晴巒建築三間兩廊屋一座中  
設神座名爲晴巒古廟鄺瑞在廟主持朝夕頂禮以爲修煉其妻  
常饋送食品到廟如遇鄺瑞在神案前頂禮誦經時不敢啟口請  
問安放食品即行歸家習以爲常迨後鄺瑞潛心修煉九轉丹成  
在蒲團上盤龍端坐不疾而死面貌如生其妻不知一連七日照  
常饋送食品到廟至第七日仍端坐不動食品仍在心即驚異向  
前呼問則見有虫由口鼻蠕蠕而出始知鄺瑞旣仙化於蒲團之

上由是遠近之人皆稱鄙瑞在晴巒古廟昇仙後來邑人均謂該廟有仙蹟於光緒二十三年由首事聯和等店將該廟募捐改建以保全古蹟至今猶存在焉

龍王廟在珠高埭村離城西三里餘康熙年間創建

按廟前有六角形石井闊約丈餘深僅四尺源源滾滾泉水清甘上流下出通鄉用之不竭往來行人皆以手挹水而飲當亢旱之時本邑知事皆步行詣廟禱雨求皆有應康熙間邑知事狄尙綱建立石碑題曰惠濟泉係狄知事撰書乾隆年間謝賴二知事倡修廟宇其後張知事有求皆應賜立匾額此足見神通廣大疊顯威靈迄至於今其聲靈之赫濯鄉人猶稱道弗置焉

康公廟在水口鄉由明竺峯寺改建  
文武廟在炭步墟

按炭步墟自前明設立以來即建有文武二帝廟爲步雲局三十六鄉之香火廟康熙六年重修一次乾隆辛未歲又復恢廓規模嘉慶二年閏月十九日被狂風暴雨傾頽後壁是歲拆卸重修新其

廟貌道光七年選拔進士考授徵仕郎即用分州林聖藻等以北極聖神慈悲菩薩尤能福佑斯人遂竝立事之於是左水月而右玉虛氣象軒昂規模宏敞矣由道光以迄光緒辛丑歷數十年廟宮又將圯壞任錦堂湯秀文等倡議重建工程約費銀九千餘兩堅緻美麗冠吾邑諸廟堂之上五月十二日誕期闔墟演戲賀之其顯靈默佑於此可見

觀音古廟在紗帽嶺離城東南一里餘

按此廟於嘉慶六年由事首吳立行等勸捐倡建嘉慶十五年由事首羅冠侯等重建後座光緒二年由事首張人鑑等勸捐重修花縣儒學訓導葉祖鎔撰立碑記覽其勝概風景幽逸嶺秀神靈香火繁盛每年所投得之司祝銀盡數撥入花峯公立進德高等小學校以充常年經費

雲山宮在鵝鵲髻城東二十里

雲山宮建於光緒二十一年乙未季春月門口題雲山宮三字欽賜翰林鍾克猷敬書門聯云僊境是耶非認幾疊雲鬟霧髻神靈

呵且護卜千秋雨順風調權知縣事浙西周經魁撰

公建

吁嗟乎語號松煙鶴唳蘿月野狐工媚山鬼笑人自來斷屋頽垣誠有不勝感深今昔者然人之欲善誰不如我或育嬰而建院或卹鰥而濟貧或習藝以惠囚或填倉而備歲禮曰有其舉之莫敢廢也作公建

常平倉有二一在縣堂側計六間一在縣署後計八間原建年分均無考

社倉在縣屬魚鍾潭計四間乾隆二十年知縣王壑捐建

預備倉在縣治東官廳一座廩三間晒場地一段共周七丈已圮

義倉在縣治東大東埭鄉縣西蓮塘鄉縣西三華鄉共三所今廢

額貯谷九千七百二十七石九升

通縣捐積社谷一千四百四十五石三斗八升

養濟院在城北安懷里內爲屋五間收養孤貧之無告者

漏澤園在城北三里內爲大塚以收暴骨之無依者

花縣志

卷三

建置志

十

義塚在城北四里周三十丈以給欲葬之無地者

育嬰堂在縣城南門外於光緒七年由恩貢生李杰材等倡建

按邑令俞煥題其門額曰育嬰堂並題其門聯曰願吾蒼生能養厥子憫爾黃口免登斯堂又由邑令俞煥撰立碑記凡貧民有兒不能自養者均可送入育嬰堂撫養好生之德洽於民心莫此爲甚

養和公所在城內縣署後於光緒二十八年由合邑建凡身故無所歸者得在公所內收殮並施棺木以惠窮民之無所告者

習藝所在縣署前光緒三十三年知事陳壽璠建今改建周邑侯祠

廣惠善堂在兩龍墟光緒庚辰年宋蔭棠黃建文等倡建

按辦贈醫施藥並立施茶亭三所一在田美一在龍口橋一在水

圍村存款二千餘元

廣樂善堂光緒十五年任潤庭等倡建

按潤庭以人心不古怠於爲善遂聯合甘小和黃耀初宋蔭棠倡建善堂於炭步用任福善堂名義首捐鉅資以爲之倡聘宣講生

以申明孝悌忠信禮義廉恥之道雇工以執拾字紙掩埋白骨越二年步雲局紳送出房舖一座以爲行善地點大紳任文燦駱天保富商黃春生湯雨溪等均出而爲之勸捐大吏聞其效廣府太守李燧送以訓俗型方之扁花縣邑侯李其雋送以普濟流光之額以是人心向風競題椽筆自時厥後每年捐款少者數百多者千餘潤庭等視其捐款之多寡以爲慈善界之廣狹宣講義理派送善書拾字紙執白骨贈醫贈藥施棉衣施棺木無一不備捐款有餘則存押生息購置產業以爲常費宣統元年潤庭等以年老歸家湯東球等接踵凡事奉行不替至今自建築善堂而還皆其前所借用於步雲局紳者

#### 炭步平糶公所光緒三十四年建

按是年洪水爲災人乏粒食步雲局紳譚敦培張仕鑾湯燎黃熙任應崧等倡議集捐平糶舉湯顧岩湯拱垣湯東球任覺民侍總理其事集資六千五百餘兩平糶一百一十餘日一方鼓腹民以無憂

### 花縣志

#### 卷三

建置志

十一

華僑義塚在三華鄉蛤蟆窩凡本邑由外洋運回之華僑骸骨無親屬承領者安葬於此地由徐茂均倡建

#### 津梁

西隅近海帆船往來東隅傍山樺楯交貫所謂徒杠輿梁民未病涉也晞鐸鯨而鼓棹共看燒劫之灰歷牽牛而問津欲取支機之石作津梁

津梁之設自古已然况東南澤國非橋梁舟楫將咫尺不能通但津之利多於梁聽民自爲爭端易起故有餉渡之規定無官渡處不准創設遞嘉慶六年又示鄉城得多置津渡然地有變遷而津渡之興廢因之攷番禺志載省往橫潭渡有九其後考東隅來往省會者祇有神山橫潭渡二大寧橫潭渡二均入橫潭海口可至新街西隅來往省會者有聯平渡炭步渡聯平渡循石門海經五和炭步赤坭而達白坭炭步渡僅上泊炭步墟嗣以橫潭海口淤塞不能上駛大寧渡額遂稟請注銷光緒間輪渡盛行改爲輪船拖渡三自粵漢鐵路通車至新街而輪渡先後停閉其二矣今雖神山橫潭渡額猶存不

過時開時止惟聯平炭步共開輪渡一艘每日往返一次省泊竹橋晨六點開歷七十里至五和墟八十五里至炭步墟百里至赤坭止近時海道日淺船輪所經鶴岡河面攔淺時虞赤坭以上爲石硤所阻更不能駛達白坭惟橋梁所在多有以縣北羣巒疊嶂溪澗紛岐水潦時降民間往來所必資每多增築茲特舉其大者要者分列焉此外多未及盡載

三度溝橋 在磨刀坑溪流上游距城北三里餘於道光年間由邑令包錦燦捐廉創建全用大方條石甚爲完固爲往來之通衢

牛牯屯橋 在城西四里餘於光緒四年由事首羅桂林等勸捐創建全用大方條石爲往來之通衢

十八零河唇橋 距城西四里餘於同治元年由事首武生張龍陞等勸捐創建全用大方條石爲往來之通衢

大埤河橋 有二上橋於光緒七年由事首羅安生等勸捐創建下橋於宣統二年由事首邱育生等勸捐創建均距城西十二里餘全用大方條石爲往來之通衢

## 花縣志

### 卷二

建置志

十一

新庄口橋 有二東橋於同治年間由事首羅俊明等勸捐創建西橋於光緒年間由事首恩貢生李杰材等勸捐創建均距城東五里餘全用大方條石爲往來之通衢

鶴嘴山夾坑橋 有二於光緒二十年由事首胡度等勸捐創建均距城東南四里餘全用大方條石爲往來之通衢

山下嶺上官坑石橋 於咸豐八年由潘鏗泉潘定魁潘元桂江廷貴勸捐倡建用長方條石建築長約三丈爲往來之大道

珠坎湖石橋 長一十五丈濶五尺餘東通石角墟西達花縣城於光緒年間由潘粹樓潘炳洪發起勸捐創建爲往來之通衢

欽差橋 在縣南二十七里銅鼓坑龍翔市北前爲入省要衝咸豐八年英法夷陷省城朝命侍郎羅惇衍太常寺卿龍元禧給事中蘇廷魁駐縣設局督辦事務道每經此窺民間之病涉特支木爲橋以便往來後人建捐易之以石故仍其名曰欽差橋

海尾橋 在縣西南六十里馬溪村西爲兩隅中道巴油水繞流而入舊支有木橋過者危悚光緒二十九年知縣祝掄望倡率邑內紳

商集捐易石堅築橋高一丈一尺二寸長六丈零八寸闊四尺中空一架以便通舟楫前後各徑均填石修補來往稱便

據碑記

岡尾橋 在縣西南六十里五和墟北馬溪林姓古廟前光緒十四年林榮發等集捐重修易木爲石中分三孔長四丈八尺並接築石路百餘丈

據碑記

大逕橋 在縣西三十二里大逕口跨渡獅嶺水往來要衝光緒十六年首事邱超慈畢定洋等集捐疊石建築橋分八孔長一十二丈八尺寬三尺六寸高一丈二尺

據碑記

海埗橋 在縣西三十里跨渡龍岡圍水橋分十二孔長二十餘丈寬三尺餘咸豐年間集捐以石建築

據碑記

新橋 在縣西南四十二里大寧村西跨渡畢村海中分五孔長一十丈寬三尺餘同治初建石迭次捐修

據碑記

鍾潭橋 在瑞雲山興隆古寺西北同治初重建以石

龍口橋 在縣南二十五里跨牛牯屯水當官路要衝疊石爲之

東門橋 在縣南三十五里橫潭墟東官路要衝疊石爲之

## 花縣志

### 卷三

建置志

十三

高塋橋 在赤坭局屬集捐而建

十八鄉橋 在縣西六十里赤坭墟爲各鄉來往要衝

大眼橋 在石湖村東南爲南花交通要道康熙年間創建道光壬子重修中分三孔高一丈二尺寬六尺長三丈六尺石疊築堅厚

據碑記

畢村海橋 在畢村東爲縣屬東西兩隅交通要道長二十丈

黃塘橋 在橫潭之東北上通田美三輒

孝思橋 在牛碓浦處往牛眠岡省墓者必經此舊以木板爲之光緒初年石湖村湯益之始易以石

十八鄉橋 在白坭墟東河嘉慶七年由姚濂宋大章等聯集十八鄉人捐資置買墟業後并建造此橋西北通三水清遠東西達省會及縣城與義渡相輔而行秋冬水淺則行橋春夏之交河水泛漲則過普濟義渡故民不病涉焉

青雲橋 在水西司之壘頭鄉地當四達明正德間鄉賢黃櫟坡公手建也清道光戊戌恩貢生黃璇章舉人黃湛瑩等重修

有序番禺舉人

洪應晃撰不備錄

橋成之日文人雅士遠近來遊拜謁鐵漢公圖像多所留題盛事也迄今猶勒石以紀之

有詩五首入藝文志

石燕渡 由水口壟頭等村到赤坭墟者必經此水口村爲利便行旅雇舟子日常在此濟人每年約須數十金

水口渡 爲水口鴨湖兩鄉交通之路

三丫涌橋 橋在鴨湖鄉張姓附近爲鄰近志公庄各鄉往來必經之路光緒五年十月鴨湖鄉張姓紳耆以行人常患涉水乃集資建築斯橋以便往來并通石頭嶺之山水以灌田禾至今行人利賴焉

鴨湖鄉張羅兩姓鄉渡 渡凡二艘張姓羅姓各一艘埭頭在天后廟前沙灘爲東岸各鄉赴炭步墟之要津

瓦窰塹亦水口村渡頭 藏書院壟頭等村雇用船艇泊此

鴨湖渡 鴨湖九賢庄四角圍志公庄大塘小塘將軍潭等村到炭步經此

十八渡 在炭步有涼亭以爲招舟休息白坭輪拖泊此

五鄉渡 在五和墟白坭輪拖泊此

## 花縣志

### 卷二

建置志

十四

牛眠岡渡 石湖馬溪交通之孔道

國泰義渡 在國泰墟東河同治七年宋維樟宋廷揚等提倡捐資創立義渡兩艘行人稱便

聯平餉渡 兩艘灣泊白坭或赤坭咸豐年間由聯平局紳稟奉省城善後總局批准立案設置行駛今改用輪拖每日裝載客商往來省城至今交通便利

風雨亭 在花縣橫潭海口岸西地當南番花交界爲省輪拖渡每日經泊行旅稱便光緒丙午間石湖村湯海山倡建惜改革後地方失序經毀

半山亭 在花縣獅峯屬東坑之左盤古山光緒二十二年捐建

按是處路通清遠層巒交錯上有塞堵故址疊石爲之土之時擣有瓦器相傳未立花縣前爲花山賊陳學進駐紮處附近有更鼓石形如鼓擊之聲遠應志載遇有山賊嘯聚用兵征剿則此夜鳴云云

墟市

先王因井制居觀爻立義摩肩相接舉袂成帷致天下之民成天下之貨交易而退各得其所矣然而飲羊俗陋屠狗人豪賣卜椎牛之倫必有賢姦溷雜者作墟市

第 一 區  
縣城市

第 二 區  
兩龍墟 平山墟 天和墟 長山脚 李溪墟 石角墟

第 三 區  
橫潭墟 梔挾墟 萬和墟 大成市 新街墟 龍潭墟 龍翔

市 長岡墟 永和市 兩和市 安和市 三角市 遠龍墟

第 四 區  
大業堂

第 五 區  
五和墟 炭步墟 大渦墟 和平市 金溪墟

白坭墟 赤坭墟 國泰墟

第 六 區  
獅嶺墟 鐵路

長房縮地亥步稽天八紘九埏真有瞬息千里者誠哉九州攸同四境畢達矣但蛇涎吹雨蠱毒噓煙驛騷乎半壁蔓延乎百城間有道路梗塞荆棘難開此亂世之事非盛平之軌也可勿論焉作鐵路本邑之有鐵路惟粵漢鐵路一線通過全境南自番禺郭塘入境中經新街三華軍田諸村落北從銀盞坳山麓出境蜿蜒三十七里有幾入清遠界該路建設起於光緒二十六年盛宣懷以督辦大臣名義與美國合興公司訂約承築所有勘路購地購料概由該公司出資建設訂期三年可以竣工如通車後二十五年得由中國收贖所有該公司用過資本若干每股票百元加貼二元半并經美國總工程司李治由鄂湘勘路至粵即於光緒二十七年先在粵築三水枝路二十九年該公司股票多為比國人占購因發生權利爭執遂於三十年停止工作清理賬目是時枝線已完竣通車幹線購地至本

邑三華店地方築至高塘鋪軌至棠溪而止光緒三十一年兩湖總督張文襄公以合興原約係美商承訂竟暗附比國人股份致生膠輻實爲違約且以粵漢爲全國南北幹線未便授權外人倡議廢約自辦廷議准之張文襄遂電致駐美公使梁誠與美商交涉廢約議訂贖路全欸爲美金六百七十五萬元另售出之金元小票二百二十萬二千元照九扣實數在總數內扣除由中國隨時自行贖回卽由湘粵鄂三省督撫會同紳商向香港政府借英金一百一十萬磅作贖路之用議既定卽由張文襄咨請兩廣總督岑春萱查照籌辦旋由岑督委派王道秉恩等接收粵路幹枝兩路是時路事卽爲粵政府主持管理張文襄贖路之初原主官辦擬增收各項釐稅三省各籌各欸爲築路及還欸之用岑督卽派司道廣府南番兩縣邀集粵省紳商到廣濟醫院籌議辦法各紳商以加抽各項經費徒增人民負擔未表贊同言論間遂起衝突番禺縣知事柴維桐遂逮捕大紳黎國廉示威致激動全省公憤時番禺許紳應騃在籍各紳商邀請到廣府學宮會議一致力爭廣州總商會九善堂乘時倡議招

股改歸商辦議定每股五元頭期先收一元二期一元五毫三期收二元五毫岑督許之并力助進行不旬日間遂招八百餘萬股此光緒三十二年丙午春事也是年四月商辦公司成立所有粵政府從前接收合興公司一切事宜及占三水枝線七分之三權利概行移交商辦公司接管遂定名爲商辦廣東粵漢鐵路有限公司八月間工程開始進行三十三年丁未六月通車至江村三十四年戊申正月本邑之新街站正式通車全年二月三華店大逕橋兩站通車四月通車至軍田八月至銀盞坳十月至源潭宣統元年己酉八月通車至琶江二年至橫石其後陸續展築將來直通武漢之期當不遠矣商公司成立之始邑人之附股者甚爲踴躍自通車以來旅客貨物運輸日增邑人交稱便焉粵路軌間係四英尺八英寸半軌條用漢陽廠製品每碼八十五磅每條長三十英尺以本地松木作軌枕每軌一對以枕木十二條承之其通車經本邑者類多平地傾坡度甚緩惟軍田站北十餘里類皆傍山行傾斜度至大爲每一百四十三尺傾斜一尺卽千尺斜七尺也其灣度最急者爲六度至七度

之間其橋樑皆美國鋼橋公司所製然在本境長橋尚不多睹僅新街墟桅夾石間一橋較長耳自大逕橋一里許有福祿壽山此山當建築時鑿土取路而土壁間現福祿壽三字紋宛若書成通車之日諸貴人多在此下車參觀車上旅客有知其事者當車過時亦常留心觀察咸嘆爲奇觀云

#### 附電報

本省電報線路有廣韶一線通過本境沿鐵路北掛祇在英德源潭兩處設有分局而本邑尚無分局收發報務惟鐵路用電報掛有兩線除收發路用電報外尙可代轉但祇限通報於粵漢鐵路各車站範圍之內在本邑者有新街軍田兩站可以通報將來鐵路與電報局接線後或可收發各地電報云

#### 郵政

本邑郵務有逐日郵班投遞信任以新街墟三等郵局一所專理其事餘各墟以代辦所十三處分理如花縣城兩龍墟平山墟龍翔市橫潭市新民埠長岡獅嶺墟龍塘白坭國泰赤坭炭步等是餘各繁

盛村鄉均置有信箱邑人頗便云

